

البلد
محمد عبد المنعم

البلد / قصص

محمد عبد المنعم

الطبعة الأولى : ٢٠١٠



دار اكتب للنشر والتوزيع

القاهرة ، ١٠ ش عبد الهادي الطحان ، المرج

موبايل : ٠١١٠٦٢٢١٠٣

E – mail : dar_uktob@gawab.com

المدير العام :

يحيى هاشم

تصميم الغلاف :

حاتم عرفة

تدقيق لغوي :

ضمة جروب

رقم الإيداع : ٢٠٠٨/١٦٩٢٥

I.S.B.N: ٩٧٨- ٩٧٧- ٦٢٩٧- ٠٤٣- ٨

جميع الحقوق محفوظة ©

البلد

محمد عبد المنعم

قصص

الطبعة الأولى

٢٠١٠



دار الكتب للنشر والتوزيع

إهداء

إلى روح الكاتب العظيم فرانز كافكا

أسئلة أحمد

٥

قمة السعادة في حياته أن يناديه الناس بأبي أحمد، النصر
الحقيقي في حياته كان ابنه أحمد، يعشق ذكر اسم ابنه في كل
كلامه، مناسبة أو غير مناسبة، ينتظر انتهاء يوم عمله بفارغ
الصبر؛ كي يعود إلى بيته مستمعاً منصتاً مخلصاً لكل كلمة
يتفوه بها أحمد، حكاياته التي لا تنتهي مع المدرسات في
المدرسة، حكاياته مع أصحابه وغيرهم منه، أسئلته الوجودية
لأبيه تفرح الأب كثيراً، وإن لم يستطع الإجابة على أغلبها،
لكنها تجعله أكثر إيماناً و يقيناً.

- بابا، هو فين ربنا؟

- ربنا في السما يا أحمد.

- طب ليه يا بابا، قاعد هو في السما وسايينا في الأرض؟

- يا حبيبي، ربنا معنا في كل لحظة، وفي أي مكان.

- في أي مكان يا بابا؟ يعني ممكن أشوفه في الحضانة، أو

عند حد من صحابي؟

لا يعرف أبو أحمد هل يضحك؟ أم يحتضنه ويبيكي؟

لن ينسى أبو أحمد في حياته يوم أن حكّت والدته أحمد له
حكاية الأسد ملك الغابة.

- طب ليه يا ماما، في جنينة الحيوانات بيحبسوا ملك الغابة
لو حده جوه قفص؟

- لأنه بياكل كثير يا حمادة، وممكن لو جاع ياكل أي
واحد ماشي.

- طب ماهو يا ماما، عم سيد اللي بيقف في الكانتين بتاع
الحضانة بتاعي، بشوفه علطول عمال ياكل، ومش بيحطوه
جوه قفص.

لم يأت استدعاءً واحدًا من المدرسة لأبي أحمد أبدًا، لم يشك
أحد مطلقًا من أحمد، قالوا أنه ما عملش الواجب وخاف، أو
اتكسف لأنه نسي الكراسة اللي فيها الواجب، أو خاف على
زعل الأبله منه - بس على زعلها - أصل أحمد عمره ما خاف
من حاجة من يوم ما عرف إن ربنا معانا في كل مكان.

اندهش الجميع من رباطة جأش والد أحمد.

تقبل الاستدعاء كأنه كان يتوقع كل ما حدث، أخذ أحمد
في صدره و مشى باحثًا عن إجابات لأسئلة أحمد الكثيرة....

البلد

البلد دي محتاجة واحد من بتوع ربنا يمسكها، كفايه بقى
حرامية لحد كده، كل يوم يطلعنا فاسد ولا نصاب جديد،
إحنا مش هينصلح حالنا أبدًا غير بالدين، سيدنا عمر-رضي الله
عنه - كان يقول إيه "نحن قوم أعزنا الله بالإسلام، فإذا ابتغينا
العزة بغيره أذلنا الله" رضي الله عنه قالنا رويته سحرية لكل
مشاكلنا وخيبتنا، بس إحنا اللي بنكابر وعمالين نمشي ورا دول
شوية، وورا دول شوية، شوية ورا روسيا، وشوية ورا أمريكا
اللي جابت لنا الكافية كلها، إنما عمرنا ما مشينا ورا كلام ربنا
أبدًا، خافين لَمَامَا أمريكا تغضب علينا، وتقول عنا إرهابيين،
وتقطع عنا الرزق، نتردد كلام بس زي البغفانات، ونقول إن
ربنا اللي يبرزق لكن ساعة الجحد كله بينسى الكلام ده
،المسلمين لو رجعوا لإسلامهم هيقوا قوة ضاربة و العالم كله
عارف كده و بيعمل ألف حساب لقوة المسلمين أما يتحدوا،
كل اللي بيحصل للمسلمين في العالم ده سببه إهم مرعوبين من
حاجة إسمها إسلام لكنهم يبقروا التاريخ كويس و عارفين أمجاد
الإسلام أكثر منا إحنا شخصيًا..

صحيح إن الدين حاجة مهمة جدًا للبي آدم، بس إحنا مشكلتنا مش في الدين، ما كل الناس بتصلي وتصوم، ولسو عليهم يروحوا يحجوا خمس مرات في السنة، بس لو السعدونية توافق، إحنا مشكلتنا في الثقة، كلنا بنخاف من بعض وبنشك في بعض لأنفه الأسباب؛ عشان كده بيوصل الفاسدين للمناصب لأنهم موثوق فيهم. إحنا محتاجين راجل كده زي الدكتور زويل بمسك البلد، ده راجل بيحترم العلم والتخصص، ويعرف يوظف إمكانيات البلد دي صح، وهيخلصي البلد تستفيد من كل واحد من أهلها، مش هيقعد يقلنا انتو كثير ومالكوش لازمة، ويقعد يعاير الشعب بالرغيف أبو خمسة صاغ.. يا جيبني، الدكتور زويل ده لولا إنه خد نوبل ما كنتش سمعت عنه من الأول، ما البلد ياما خرجت عُلماء، وما حدش سمع عنهم، ولسه بتخرج وتهخرج، أهو إحنا كده نستنى لما الغرب يعترف بواحد فينا ويديله جايزة، نقوم نقعد نطلبه كلنا كأننا مقتنعين تمامًا إننا مجموعة من الحمير مش ممكن يطلع منهم علم أو ثقافة أبدًا، ومفيش غير الدين برضه اللي هيرجع لنا الثقة اللي بتكلم عليها، الدين لما نطبقه في كل حاجة في حياتنا من أول العبادات لحد أمور السياسة، مش زي ما هما عايزين الدين يبقى جوه الجامع و بس..

يا عم، الدين مش هيعمل منا ملايكة ماشية ع الأرض،
ولازم نفكر، ونتعلم، ونهتم بالعلم ده لو إحنا عايزين فعلًا حالنا
ينصلح، والعالم يعمل لنا حساب يجدد.

الحاج

- يا حاج، بصراحة انت كده بتبيع بنتك رخيص.
- والله ما عندي حاجة غيرها أبيعها، وبعدين آخرة كل واحدة راجل يسترها، وبيت يللمها.
- يسترها، ولا يشتريها يا حاج.
- كده ولا كده أهو اسمه راجل، والراجل زي ما كانت أمي الله يرحمها بتقول كلب بيحمي مراته من باقي الكلاب، أنا ما بقتش قادر أكمل وأشيل الحمل لوحدي، لازم أحلص من واحدة فيهم بجوازة مستريحة زي دي، أطلع منها بقرشين كويسين أستر بيهم بقية الفريق.
- يا حاج، صدقني الله يرضى عنك، انت كده بترمي بنتك في التهلكة، ده هيدلها ويحرمط كرامتها، وهيشغل بنتك خدامة لمراته الأولانية، وبعدين الأهم من كل ده بقى الخلايجة دول عالم ولا مؤاخذه، ما يملاش عندهم غير التراب، وبيتجوزوا النسوان طغاسة ودناوة، آه اسألني أنا. بص يا حاج، من الآخر كده، أنا خلصت ضميري قدام ربنا، اللهم بلغ اللهم فاشهد، وانت حر بقى يا حاج، اعمل اللي تعمله.

انتحار

- هو بقى كل واحد التهمضم حقه، ورفضوا يرقوه، ورقوا زميله المسنود، يروح ينتحر، الانتحار ده كفر؟!

- من قال أنه كافر؟

- الانتحار كفر؛ لأنه اعتراض على قدر الله.

- بس هو انتحر اعتراضاً على قدر البشر.

- معروف أن قتل النفس كبيرة من الكبائر.

- وقتل الحلم جريمة أكبر.

-الدين مايتكلمش عن قتل الحلم.

-الدين نفسه حلم، حلم بحياة أفضل على الأرض، الدين جنة على الأرض، الدين طريقة وأسلوب حياة، مش ده كافر وده مؤمن. الدين تعويض لآدم عن خروجه من الجنة.

- آدم نزل من الجنة؛ عlishان أكل من الشجرة، وما سمعش
كلام ربنا اللي نهاه عن الأكل من الشجرة دي بالذات.

- عمرك حلمت بحاجة وما تحققتش؟

- كثير أوي، بس دائماً عندي أمل، دائماً غسى اللي
ما تحققتش، وافكر إني لسه عايش وفي حاجات كثير ممكن
أعملها، بس لازم الواحد دائماً يصبر.

- آه، يصبر لحد ما يموت لوحده بحسرتة وخنفته.

- لازم تكون مؤمن، والمؤمن منصاب.

- ما تعرفش ليه يا أخي، كل المسلمين في مصر فاهمين إن
الواحد لازم يطلع ميتته في الدنيا ظلمًا وفسادًا من حكام،
ومسؤولين، وحرامية ومغتصبين؛ عlishان يدخل الجنة في
الآخرة. يعني ما ينفعش أبدًا ندخل الجنة في الآخرة ونعيش صح
في الدنيا؟

- كلنا نفسنا نعيش صح زي ما بتقول، إنما العالم الكفرة
هما اللي عايزينا دائماً متأخرين ومتخلفين، ودي كلها فتن ربنا
قالنا عليها.

- إحنا اللي بنفتن نفسنا، أخلاقنا وتصرفاتنا مع بعض هي
سبب الكافية كلها.

- انت مابتقراش قرآن ولا إيه (وَلَنْ تَرْضَى عَنْكَ الْيَهُودُ
وَلَا النَّصَارَى حَتَّى تَتَّبِعَ مِلَّتَهُمْ).

- الدول المتقدمة كلها مش في دماغهم الدين زي ما انت
وغيرك فاكرين، الناس دي ماعندهاش وسواس الدين زينا كده.
- الإسلام بيتحارب من أيام النبي ولحد يوم القيامة.
- طب ليه مانقلدش الناس اللي بتحاربنا ونعمل زيهم؟
علشان نعرف نغلبهم.

- ياعم، نقلد عالم كفر؟ دي ناس بتتريق على ديننا،
ويبشتموا النبي عليه أفضل الصلاة والسلام، وكمات نسوانهم
ببمشوا عربانيين في الشوارع، ورجالتهم خوالا، يا عم دي
الرجالة هناك بيتحوزوا بعض، والستات كمان بتحوز بعض.

- هو ده بس السبب اللي تعرفه عنهم أو اللي حاسب
تعرفهم عنهم؟ طب وإيه رأيك في الشباب اللي طهقان من
البلد وقرف من حياته وعاوز يسافر للعالم الكفرة اللي بتقول
عنهم حتى لو غرق أو مات في الطريق؟

- دول شباب إيمانه برينا قليل، عايز يروح للفلوس الكثير،
والنسوان الحلوة، عايزين يعيشوا حياتهم، انت عارف بلدنا دي
لولا الحرامية كان بقى شكلها حاجه تانية خالص، مش شايف

الحرامية اللي بينصبوا على الناس وعمالين يمسخوهم كل فترة،
والجماعة بتوع توظيف الأموال في الكروت والبورصة...

- ياريت المشكلة تبقى في الحرامية اللي يمسكوهم،
الكارثة الكبيرة في الحرامية اللي مش بيمنسكروا، المصيبة في
حرامية الأحلام.

ناردين

1

2

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

42

43

44

45

46

47

48

49

50

51

52

53

54

55

56

57

58

59

60

61

62

63

64

65

66

67

68

69

70

71

72

73

74

75

76

77

78

79

80

81

82

83

84

85

- يا حوكة، دي فرصة عمري وحت لحد عندي.

- يا نادرين، قصدي يا فيتامين، قصدي يا ناررردين، أنا عارف بس ماله اسم سنية، ما علينا انت معنديش أي موهبة، ولا عمر صوتك كان حلو، ولا حتى سمعتك بتدندني قبل كده، يبقى إزاي بس تقولي لي هتبقى نجمة ومش عارف إيه...

- بقى كل الإمكانيات اللي عندي دي وتقول مفسيش موهبة، ده أنا كل حنة في جسمي موهبة لوحدها، هو في حد النهاردة فاضي يسمع، الكل عاوز يشوف ويعلى عينيه، أيام السمع والسلطنة دي كانت أيام زمان، أيام ما كانت الأغاني بتقعد بالساعة والساعتين، إنما دلوقتي الناس تحب تشوف حاجة بتتحرك قدامهم، تنسيهم الغم والقرع اللي شايفينه في حياتهم، الفيديو كليب دلوقتي بينافس ماتشات الكرة، اللعب فيه أكثر، وزوايا التصوير كتيرة أوي، وكمان في إعادة ليل ونهار على

قنوات ما وراهاش حاجة غيره، يعني فيديو كليب واحد يخليني
نجمة، وكل الناس تعرفني.

- وأنا بقى إيه لازمني، هتبقى نجمة والناس عارفك،
وتنططي عليّ بعد كده، وما أعرفش أكلمك مش كده...

- مين قالك كده؟ يا عبيط، انت هتبقى مدير أعمال، ترتب
لي مواعيدي وتتفق لي مع المنتجين والمخرجين، عارف أنا
نفسي في إيه يا حوكّة؟ نفسي أعمل دويتو مع كاظم الساهر،
يا سلام زي ما عمل كده أنا وليلي يعمل أنا وسنية، قصدي
أنا و ناردن...

- بصي بقى يا بنت الحلال، اللي أوله شرط آخره نور،
كله إلا ده، كاظم ده الحريم بتموت فيه، وأنا بقى هابقى مدير
أعمالك زي ما بتقولي يعني مش شرابة خرج...
- أنور...

- يا متر، وإحنا مائنا بالشغلانة دي، إحنا هنصلح الكون،
واحدة وماشية على حل شعرها...

- يا بني، فين القيم والمبادئ، لازم الناس دي يبقى في حد
يقف لهم، لازم يحترموا عاداتنا وتقاليدينا واللي اتربينا عليه،
الدنيا مش ساية، طول ما إحنا سايينهم يقلدوا الوساحة اللي
في الغرب يبقى عليه العوض في الأجيال الجاية، فهمت و لا لأ؟

- يا متر، إذا كان أهلها موافقين و راحلها يشجعها على كده ويستفاد من وراها، هنيجي إحنا ونتكلم؟!

- يا بني مش عشانها هي ما تتحرق بجاز وسخ، إنما لازم الناس تعرف إن اللي بيتعمل ده ما يصحش، بدل ما هنلاقي البلد اتحولت لأوضة نوم كبيرة، ساعتها بقى مش هنقول العالم أصبح قرية صغيرة، لأ هنقول العالم أصبح شقة دعارة صغيرة.

- حوكة...

مهما كان ما كانتش توصل للقتل يا حوكة، أنا كده كده كنت ناوية أبطل خالص والله، الله ينعل أبو دي شغلانة، ده أنا حسيت إني رخيصة أوي.

- لو اتكرر اللي حصل ده ألف مرة كنت هاسيح دمه برده، تبطلني ما تبطلش مش فارقة في حاجة.

هو قال عنك بتعملي حاجات منافية للأخلاق، والذوق العام، وتدمر القيم في البلد، طب والقواضي بتاعت المخدرات وتسقيع الأراضي اللي بترافع فيها، كل واحد وله السبوبة بتاعته، ميجيش بقى يعمل علينا شويتين القيم والمبادئ.

- يا حوكة، انت ضيعت نفسك ومستقبلك.

- أنا ضيعت نفسي عشان خاطر المستقبل، البلد دي حالها

عمره ما هينصلح إلا لو اختفوا كل اللي زي أنور ده.

کارت شحن

- يا عم، بيني وبينك كده أنا ما ليش في المشاريع، لاقيت الناس كلها فتحت مراكز اتصالات عملت زيهم.

- وماشي الحال معاك؟

- ما انت عارفت اللي فيها، منهم لله الحريم، كل واحدة تيجي تفتح معاي كلمتين لازم أظهر قدامها الشاب الفيس وانفحها كارت ولا كارتين شحن، وأخذ نمرتها ونعمل جو...

- بس انت كده فاتح سبيل، مش فاتح مشروع...

- يا حسين، والله أنا نفسي أبطل الحكاية دي، بس أعمل إيه كل حرمة بتيجي تكلم من عندي بأقوم وأخذ رقمها، ومأنتم معاها على طول.

- لازم تمسك نفسك شوية يا ابن الناس، بدل ما هيتخرب بيتكو...

- يا عم، ما تقلقش ربك بيسترها، وبعدين أنا ناوي أتوسع
زي ما قالت لي البت ريهام وأعمل وصلات دش، ده اللي
ماشي دلوقتي، بدمتك إيه رأيك في الأفلام اللي على القنوات
المشفرة اللي بنتفرج عليها، أهو أنا ناوي بقى أعمل خدمة
عامة، وأساعد الشباب وأعملهم دماغ عالية أوي وهما قاعدين
في بيوتهم قدام التلفزيون أو الكمبيوتر.

- ودي رخرة هتفتحها سبيل؟

- لأ يا عم سبيل إيه انت عارف مبدئي، مجأنا للحریم فقط.

- ماشي يا عم، اللي علي علي.

- الحق حكومة حكومة...

- افتح الباب ياله...

- نيرت فيها يا سحس، يا بن الكلب...

فوتوشوب

- يا عم، ده كله شغل تركيب والله العظيم مش حقيقي.
- ياعم، تركيب إيه؟ ده انت اللي عبيط، إذا كان اسمها إيه الرقاصة دي اعترفت إنها هي.
- ما هي دي حالة خاصة، إنما الباقي كله صدقني شغل فوتوشوب؛ عشان المراهقين اللي زيك.
- يا أهبل انت، هما اللي بيعملوا الأفلام دي ويوزعوها؛ عشان يشتهروا بسرعة والناس تكلم عنهم، دي عالم نجاسة مستعدين يعملوا أي حاجة تتخيلها عشان الشهرة والفلوس.
- بس اللي سيادتك بتشوف صورهم في الأفلام دي بيبقوا مشهورين خلفة، ومش محتاجين أفلام زي دي عشان تشهرهم...
- مين قال؟ زيادة الخير خيرين برضه.
- يا حبيبي مفيش أكثر من الأفلام دي في السوق، بكل اللغات والجنسيات، إيه بقى اللي يخلي ممثلة ولا مغنية عربية تفضح نفسها بفيلم زي ده؟

- أنا أقولك، أصل المغنيات والممثلات المزور دول وخصوصاً
بقى بتوع لبنان (أجدع تحبة لكل حريم لبنان، وربنا يجعل
كلامنا خفيف عليهم) مش مخلوقين من طين زينا، لأ يا معلم،
دول مخلوقين من ملين، دول بيستحموا بلين يا عم، واللين يحب
اللين...

- يعني إيه بقى يا فيلسوف عصرك، وأوانك اللين يحب
اللين؟

- هي دي كمان محتاجة تفسير يا غشيم، هما عايزين
الشباب طول الوقت يبقوا مهووسين عليهم؛ عشان يضمنوا
يفضلوا نجوم كده على طول، فهمت يا أهبل ولا نقول كمان؟

قال النبي

- يا بابا، نجد مش قادر، أنا مش داخل جوامع تاني أبداً،
ريحة السجاد تخنق.

- يا بني سيدنا النبي قالنا إيه؟ قال الأجر على قدر المشقة،
يعنى كل ما تستحمل أكثر كل ما فرصتك في دخول الجنة
تكثر.

- يا بابا، حرام عليك، إيه الكلام اللي بتقوله ده؟ انت
ناقص تقولي اطلب ٠٩٠٠. عشان تحش السحب، يعنى السني
برده مش قال النظافة من الإيمان، وقال اللي ياكل بصل أو توم
ما يهوبش ناحية المسجد خالص، يعنى لازم نراعي بعض.
- سيدنا النبي قال لنا كل حاجة حلوة، بس إحنا ننفذ...

- الله ينور عليك، لما ننفذ بقى هبقى أدخل الجامع.

- لو كل واحد استنى الدنيا ينصلح حالها عشان يتحرك
عمرنا ما هنغير أي حاجة أبداً، وهيفضل حالنا كده مايل على
طول...

- يا بابا، إحنا حالنا مايل عشان الدين عندنا بتتروق بيته،
يعني واحدة بتتحبب عشان يجيلها عريس، وواحد عايز ينجح
في الانتخابات يقعد يقول قال الله وقال الرسول، فنان مشهور
أو رجل أعمال يدخل السجن يقعد يكلمنا عن تجربته الإيمانية
في أحضان السجن وإنه عرف ربنا جوه السجن، وإنه قسرا
المصحف في خلال ست شهور ٨ مليون مرة، يطلع من
السجن تلاقي ريمة رجعت لعادتها القديمة وتلاقيه نسي ربنا اللي
لسه متعرف عليه جوه السجن.

- عندك حق يا بني.

حكاية الأسطى عشري

عشري

- ما هو يا شيخ مصطفى، ما تقوليش إن واحدة تخرج من بيتهم بالمنظر ده ومايقاش ليها شوق في الدلع والمعاكسة.
- يا أخي مين قال كده بس، يعني لو واحد خرج من بيتهم وساب الباب مفتوح، تبقى حلال فيه السرقة.
- سرح عشري في نخيل باب الشقة المفتوح وهذه الفرصة الذهبية للسرقة، ثم رد على الشيخ مصطفى وقد أخذته الحماسة الدينية:
- يا شيخ، السرقة حرام، ولو بنطبق شرع ربنا في البلد الوسخة دي كان يبقى فيها قطع إيد كمان، لكن النسوان الخلوة اللي بيخرجوا ملط دول حكاية تانية خالص.
- حاول الشيخ مصطفى أن ينتهج الأسلوب النبوي في التربية والتوجيه تجاه عشري.
- "يا عشري أترضاه لأملك، أترضاه لأحتك"، نزل عشري الشيخ مصطفى أمام بيته وقال له: نكمل كلامنا بعدين يا مولانا، وانطلق بالميكروباس.

أحمد

بص يا عم عشري، أنا والله مش هادخل، من بره كده في
السخان، أصل الزنا ده ذنب كبير أوي أنا مش قده، وبعدين
برده إنت عارف الشهوة بقت عاملة إزاي-في-الزمن ده،
والبنات إتوحشت أوي ومش حاسين بالنار اللي بتاكل في جنة
الواحد، معندهم مش دم، جتهم مصيبة تاخدهم كلهم وتريحنا
منهم.

يا بني، ولا حتى تدخل، ما انت عارف إني أنا بحب أساعد
الشباب الشرقان اللي زي حالاتك، ولا يهتمك من حاجة، و
بعدين ده انت أبوك حبيبي، ويصدق لي دماغني أول بأول.

لأ وحياة أبوك انت يا عم عشري، بلاش تحب سيرة أبوي
في الموضوع، أنا مش ناقص قلق، بدل والله ما أرجع في
كلامي.

طب يا عم خلاص ما تزقش، وحياتك ولا أنا كمان بحب
أجيب سيرته، لحسن ألافه ناطط لي زي القضا المستعجل، ألا
قولي يا أستاذ أحمد، هو ليه الحاج أبوك بسلامته بقى ما
جوز كشي لحد دلوقتي؟ خصوصاً يعني إنه راجل مقتدر، يجوزك
بدل الواحدة اتنين وتلاتة.

النصيب بقى يا عم عشري. انت هتفتح لي تحقيق ولا إيه؟

يا عم مش القصد، بس انت صعبان علي أوي و انت لايد
كده.

يا عم عشري، المسألة مش مسألة جواز، وأي واحدة
تتركب والسلام، دي حياة كاملة، لابقى مرتاح فيها لأما مش
عايزها من أصله.

أهو ده بقى الكلام اللي مش جايب همه، هو انت فكرك
فيه واحدة ست في الدنيا الطويلة العريضة دي كلها ممكن تبقى
مستريح معاها، وتحس إنك سلطان زمانك، دول بيعشقوا
حاجتين بس في الدنيا: النكد والفلوس، بس برده يا أستاذ
أحمد، النسوان دول شر لا بد منه إن جيت للحق، أنا سواق
علي ميكروباص باركه كل يوم، و باكل من وراه عيش، بس
ركوبة المرة دي حاجة تانية خالص.

بقولك إيه يا عم عشري، انت هتجرّي الدم في عروقي على
الفاضي، خلينا في المهم آجي إمتى؟

يا عم اللي يريحك، أقولك خليها بكرة بعد العشاء، هكون
أنا ساعتها بجيب الوردية من القطامية.

زینات

لم یستطع أحد أن یتمالك نفسه أمام جسمها البض، لم یصدق أنه الآن بین ذراعی امرأة بكل هذه الفتنة والغواية، إلا أن الأمر الذي أثار استغرابه الشدید، ولم یستطع أن یفهمه هو کیف یترك عشري الكلب هذا اکثر الذي یملكه هُنا لأحبابه وأصدقائه؟!

"ثلاثة قد حرم الله- تبارک وتعالی- علیهم الجنة: مدمن الخمر، والعاق لوالديه، والدیوث الذي یقر فی أهله الخبث"
حدیث نبوی شریف.

- و حياة أملك انت جاي هنا تقولي الكلام ده! ما تقول
لذكر البط اللي قاني.

- طب وانتي، ليه ترضي كده على نفسك، ما تطلبي منه
الطلاق.

- و لما اتطلق يا حنين، هتجوزی انت، انت عايزی اتطلق
وأبقى فی الشارع، عشان أبقى بعد كده لطوب الأرض، أنا ما
لیش متوی غیر مع النطع ده، قسمي و نصي.
أكید جوزك ده ولا مواخذة يعني مالوش فيه.

- مين قالك كده، ده بيبقى معاي على السرير عامل زي
الطور الهايج، بيبقى خلاص هياكلني بسنانه.
- طب منين ييجبك أوي كده، ومش مقصر معاكي،
ومنين بيسيك لحاييه؟
- دني، كيفه كده، بيقول أنا أحب أدلع حبايي، و ماعزّش
عنهم حاجة أبداً، حتى ولو كانت الركوبة بتاعتي.

عشري

- انطق يا له إزاي تعمل كده في العربية، عايز تنجس لي العربية اللي بأكلم منها عيش يا خول، كنت عمال تفحص في إيه ، انطق يا له، أنا شفتك في المرايا ، فاكرني مركب آرايل يا روح أمك، إلا العربية يا بن الكلب يا نجس.

- ألا، في إيه يا عم عشري انت هتعملنا فيها شيخ طريقة على آخر الزمن ولا إيه، ما احنا عارفين اللي فيها و اللي بيته من إزاز ما يحدفش الناس بالطوب يا نجم.

- إزاز إيه و طوب إيه يا كلب ، أنا أعمل أى حاجة يا له بس بمزاجي ، لكن اللي يستخفني أطلع... أمه، فاهم ولا لا يا روح أمك.

- خلاص بقي يا أسطى عشري انت الكبير قلبك أبيض عيل و غلط محصلش حاجة.

- محصلش حاجة إزاي يا عالم، و حياة أمي ما أنا سايه غير في القسم عشان يبقى يطرطش بالكلام حلو.
- أنا عايز أبقى آجي أزورك قريب يا عشري

- يا باشا تأنس و تنور فى أى وقت إحنا خدامين الحكومة
بس تتوصالى بالواد ده حبتين.
- ما تقلقش يا عشرينى أنا هقطع لك لسانه خالص .
- يذهب الباشا لزيارة عشرينى كما اتفقنا
- يا أهلاً يا باشا والله البيت كله نور.
- هو فى البيت ده يا روح أملك ، إخلص فىن الحتة.
- لا مؤاخذه يا باشا ماليش مزاج النهاردة ، تقدر تيجى
فى أى يوم تانى و الولية تحت أمرك يا باشا.
- كانت هذه اللحظة هى أغلى لحظة مرت على عشرينى فى
حياته، أحس أنه سلطان زمانه ولم يبال بما سوف يفعله الباشا
معه فيما بعد.

كنيسة

كان العمل البطولي الأوحى في حياته عندما أصبح صبياً
يافعاً، لم يكن يتقرب إلى الله بكثير صدقة، أو صلاة، أو صيام،
كان يتقرب إلى الله بطريقته الخاصة، رشق الكنيسة المجاورة بيته
بالحجارة من أعلى سطح البيت، كان قربته إلى خالقه، كان
سلوكه صبيّاً تطوراً طبيعياً لسلوكه طفلاً، هل من المعقول لطفل
أن يكون رشق القطارات بالحجارة هو لهوه المفضل و لعبته
الأثيرة، ليس هذا فحسب، بل كان يطرب بشدة لسماع أقذع
السباب من الركاب، ينتشي بشدة إذا نعت أحدهم بيته بأنفسا
"بيته واطية"، أو سبه هو (و اللي خلفوه)، لم يشأ قس الكنيسة
الذي لمح في إحدى المرات أن يوبخه على مرأى ومسمع من
الناس، و ربما كان يخشى تصعيد الأمور، فحوادث أبسط من
هذه بكثير كانت سبباً في فتن ومشاحنات طائفية لم تحمد
جذوتها حتى الآن، خاطبه القس بمتهى الرفق مستفسراً عن
السبب وراء فعله هذا.

أصل بصراحة كده يا عم القسيس، أنا متضايق منكرو أوي،
عشان بتقعّدوا تشتموا سيدنا محمد في الكنيسة بتاعتكرو، و
تقولوا عليه كذاب.

انت سمعتنا يا بني بنقول الكلام ده؟

مش لازم أسمعكوا بوداني، بس طالما بتكرهونا يبقى هتقعّدوا
في الكنيسة تقولوا إيه يعني؟

مين قال إننا بتكره حد، يا بني، أي دين بيدعوا الناس إلهما
تحب بعض، وتتعاون مع بعض، الكلام اللي بنقوله في الكنيسة
مش زي مانت فاهم خالص، إحنا بنقول الله محبة، يعني طريق
الله هو طريق الحب مش الكره والعنف، ولو انت بتحب دينك
بجد عمرك ما هتمشي في طريق الكره والحقد، و نبيك محمد
وصى على سابع جار، وكان له جار يهودي كان بيحط الزبالة
والقاذورات قدام باب بيت النبي، لما مرض جاره ده راح سأل
عليه، لا أنا الرب هيحبني لما أشتم على اخواني المسلمين، ولا
هيحبك انت لما ترمي الكنيسة بالطوب، فهمتني يا خالد يا
بني؟؟؟....

رابعة .. نادي السكة

- و الله يا بيه ياما نصحوني عندنا في البيت، بس أنا مش
غاوي سكة العلام دي فحائي، وأدي آخرتها بقيت سواق
ميكروباص، أي زيون معفن ممكن يتنك علي، والله العدة اللي
معايا دي رابع عدة أجيها في شهرين، العدة الأولانية اتسرقت
وأنا طالع دور رابعة، فردة الكاوتش ضربت نزلت اغيرها بحط
إيدي في جيبي ما لقتش الموبايل، العدة الثانية كانت من أم
كامرتين كانت أنصف عدة مع سواق على الخط، أخوي محمد
نقيب في الجيش والله يا بيه خدها مني وضرب عليها، العدة
التالثة بقي كانت تاللة تلتمية كنت بمشي بيها نفسي كده لحد
ما جبت اللي معايا دلوقتي ده، دي عدة بقي يا باشا اسمها أي
ميت، فيها كل اللي تنخيله، التكنولوجيا كلها في العدة دي يا
باشا، أنا الناس بتشوفني عمرهم ما يصدقوا إني أنا سواق، بس
أنا اللي عملت في نفسي كده، يالا محدش بياخد أكثر من
نصيه، طب و العشرة دول يا باشا و ما ليك عليّ عيين، أي

حاجة بتحصل في عيلتنا إلا ما لازم ياخذوا رأيي فيها؛ عشان
أقولهم ع الصبح، البلد بقي حالها واقف خالص يا بيه، بروح
أجيب بخمسة جنيه عيش ليًا أنا ومراتي وبنتي عندها خمس
سنين، والله ما بيكفي يومين على بعض، أصل أنا بجيب من
الرغيف أبو ربع جنيه، مابقفش أنا على طابونة ولو الدنيا
اتطربقت، كل حاجة قلت بركتها، انت عارف أسهل حاجة
تعرف تحيها الكيف والله يا باشا، عيني عينك كده، أصلهم
عايزين الشعب يعيش في غيوبة على طول؛ عشان ينهبوا هما
براحتهم و يمحسوا خيرها لوحدهم، البلد دي يا باشا مهما
تنتهب برضه لسه فيها خير، كنا ناقصين بدمتك إحنا قوانين
تاني عشان المرور اللي عمره ما هيتظبط، بس تقول إيه بقى،
أهي سبوبة سقع لباشوات الشرطة، وباريت القوانين الكثير دي
فيها قانون واحد بيطبق على المعرضين الكبار، ألا كله بيحجي
على قفا الغلابة، والله بقت عيشة تقصر العمر، عارف يا باشا،
أنا نفسي أبيع الميكرو باص ده، وأشتغل مغني ده اللي ماشي
دلوقت، أعملي شريط كده كام كلمة دراما على لحن حزين
زي الشعب بتاعنا ده يعلم مع الناس، دوشتك أنا ها؟

- بالسلامة يا باشا.

رابعة نادي السكة رابعة رابعة رابعة.....

ضرورة فنية

قعد ياختي طول التصوير يقولي اغمزي كده، أقوله ليه
يقولي ضرورة فنية، مش عارفة اتقصعي إزاي أقوله ليه يقوم
قايلي برده ضرورة فنية، مش عارفة امسكي السكينة إزاي
وقشري التفاحة دي، واعصري الليمونة دي، لحد ما وصلنا
لمرحلة القلع، ودخلت أوضة النوم قصدي اللوكيشن بتاع
التصوير، فضلت مستنية ياختي المخرج يجي ساعتين ومجهزة
نفسى على الآخر، ما أصل أنا افهمها وهي طيارة، وأهو كله
برده بتمنه هو يخليني نجمة وأنا أظبطله مزاجه، بس كسفيني وما
جاش، لا هو ولا حتى المنتج، بس إن جيتي للحق المنتج بيطلب
مني حاجات كثير من غير ما يقولي البتاعة دي ضرورة فنية،
اللي عايزه يقولوا بصريح العبارة، من غير تزويق كلام، ألا ما
تعرفيش هي ضرورة فنية دي كلمة قبيحة؟

طلاق

٦٥

خبرته هذه كانت أكثر ما يخيفني منه، فرمما دفعته لزوجات لا تنتهي، كنت أتمنى أن تتعلمها سوياً، أن نكتسب حساسية اللقاء بالتدريج، أن نمر بأطوار البراءة و السذاجة سوياً، نخطوا خطوات بطيئة حتى نصل معاً، لم يكن يزعجني تفوقه عليّ في هذا الأمر مطلقاً، كل ما في الأمر أني كنت أريده أن يعتمد عليّ وأعتد عليه، لم أكن أرغب في دور مروضه الأسد، ربما ينتظر الفرصة ليوقع بغزاة أخرى، وربما شجعه الأطباء على ذلك، فعدم الإنجاب ليس معلوم السبب، فقط تغيير العتبة من الحائز جداً أن يغير الحال، وساعتها لن أقدر على لومه، ربما تحفظي أثناء اللقاء هو السبب، أو اندفاعه الشديد هو السبب، لن أستطيع أن أمنعه من الزواج بغيري لو أراد، لكنه لا يريد أن يتزوج بأخرى، لكنني أحس بالخيانة، لا أستطيع أن أتغاضى عن علاقاته بنساء أخريات، عدم الإنجاب ورفضه الزواج من امرأة أخرى، ليس تصريحاً ضمنياً مني بقبول الخيانة، كيف أقبله زوجاً فقط، ويكون رجلاً لي ولغيري؟

كل هذا الوقت أمام المرأة، إنه لا يراني ولا يشعر بي، هو يرى نفسه وحده في المرأة

- طلقني.

عانس على ذمة السيد فلان

Y.

في كل مرة كانت تجدد حجة مختلفة؛ لتمنع نفسها من مشاهدة ما كانت تتوقعه بالفعل، في كل مرة كانت تضع الاسطوانة في جهاز الكمبيوتر بيد مرتعشة، ومع أنها متأكدة تماماً من عدم مسؤوليتها عن هذا الأمر، إلا أنها أحست أن في الأمر جرح شديد لكرامتها وكبريائها الأثوي، على الرغم من أن الزواج بينهما كان واجهة صورية إرضاء لرغبة المجتمع المحيط.

يوم الشبكة، أمي فرّجت الناس كلها على الشبكة؛ لتثبت لهم أن بنتها اللي وصلت خمسة وتلاتين سنة من غير جواز، أهو جالها العريس وقدم لها شبكة زي أي بنت، كان الجواز في نظر أمي شبكة بيني وبين المجتمع، شبكة تنقلي من حزب المنبوذين، من عوانس، وأرامل، ومطلقات، لحزب الجواز، والراجل، وضل الحيلة، والخلفة، والعيال، ومش مهم أي حاجة تانية.

الحصول على عريس معركة تشحذ لها كل طاقات البنت النفسية والجسدية منذ مولدها، والويل كل الويل لها لو فشلت في مهمتها، كل الأسلحة مصرح باستخدامها، تضيق بعضهن الخناق على الرجل بتضييق ملابسها، لكن إذا باءت كل المحاولات بالفشل فعليها وحدها يقع العيب، وعليها أن تتحمل جحيم العنوسة.

أنا دلوقتي اللي بصرف على البيت، وبصرف على جوزي اللي نشلني من مستنقع العنوسة، فلازم أرد الجميل وأصرف عليه، واستحمل عيوبه، وبخله، وأنايته، فكفى بها تضحية عظيمة من جانبه أن ينتشل فتاة من براثن العنوسة، ينبغي أن تشيد تماثيل له ولأمثاله من الرجال.

تجرات و حطيت الاسطوانة في جهاز الكمبيوتر لأول مرة، لكني لم أفاجأ مطلقاً، وهو لم يحاول في أي مرة أن يخفيها عني، بل على العكس كان عاوز يوصلني رسالة مهمة من خلالها، لم أحزن ولم أغضب، لم أحاول أن أثور عليه أو أطلب الطلاق، فليستمتع بحياته كيفما شاء، فلقد ضحى و قدّم الكثير والكثير.

عروبة

- أشرف رجع يا حاجة.

- حمد الله على السلامة يا بني، ده كنت فاكراك بطل،
إزاي ترجع من غير ما تاخذ بتار الولايا اللي اغتصبوهم في
العراق، إزاي توافق أن الصهاينة هم اللي يطلعوا قرار براءتك،
مش مكسوف وانت راجع، عاجبك إيه في ديتنا دي عشان
ترجعلها؟!!

- يا أمه أنا راجع عشانك، ده أنا شفت أسود أيام عمري
في السجن هناك، بعد ما الأمريكان دخلوا وخربوها.

- مين قالك أني هافرح لما ترجع، كل واحدة نفسها تقرا
اسم ابنها في اللي راجعين إلا أنا، كان نفسي أحلم بيك عريس
في الجنة.

- يا أمه، أنا كنت بتعب وأشتغل في العراق عشانك انت و
إخواتي، عشان نستّر البنات زي ما طول عمرك بتحلمي، انت
ناسية بناتك يا أمه، اللي فاتهم قطر الجواز، ناسية حمل البنات

يامه، وعمالة بتقطمي في، استري ولادك يا مه وخديهم في
حضنك، و احمدي ربنا على كده ، ما باليد حيلة، ضللي علينا
وانسي بقى ده ما يقدر على القدرة إلا ربنا.

- يا ريتك سترت الولايا اللي هناك بدمك.

- يا أمه، أنا ما رحتش هناك عشان أحارب، كفاية عليّ
حربي مع نفسي عشانك انت وإخواتي.

- يا بني محدش بيختار الحرب، الحرب هي اللي بتختاره.

- يا أمه لحد امتي هنفضل ندفع ممن غلطات غيرنا، هما اللي
عملوا كده في نفسهم، إحنا ضحينا كثير أوي وياما شيلنا
الطين عشانهم، ودلوقتي بيعاملونا زي ما نكون عبيد عندهم،
يروحوا هما بقى يحاربوا ويسيبونا نستريح شوية، مش معقول
نفضل طول عمرنا نحارب وهما بيتفرجوا علينا، ويفرتكوا
فلوس البترول يمين وشمال، وعایشين حياتهم بالطول والعرض،
واحنا رغيّف العيش مش لافيينه، لأ وأخرة المتمة يتريقوا علينا
ويشتمونا، م الآخر كده يا مه، دي ناس ما يستاهلوش نضحى
عشانهم.

- الله يخيبك، هي بقت إحنا وهما؟!

- بقت إحنا وهما؟؟؟؟.....

مؤامرة

- ليه اتجوزتني؟ طريقتك في التعامل معاي، كلامك، أسلوبك، كل ده معناه إني مش فارقة معاك، وجودي زي عدمه، طب ليه ربط نفسك بيا؟

- أنا ما يهمني في الست- أي ست - غير أنها تبقى شايقة طلباتي، أنا وعبالي أول بأول، وتلتزم بفروض ربنا، ولما أعوزها في أي وقت ماعدا وقت الحيض تكون تحت أمري، أي فلسفة تانية يخوتوا دماغك بيها العلمانيين بتوع الجرايد والفضائيات ماليش دعوة بيها.

- انتوا ليه بتتصوروا إن الدين ده ذكر، الدين للإنسان رجل أو امرأة، لما ربنا أمر الست بطاعة جوزها مش عشان يجي الراحل يذلها، ويستخف بدورها في الحياة، يعني اللي ما يخدوش منها برضاها يبقى له كل الحق ياخذه بالعافية، والقهر، والتسلط.

- بصي، والنبي أنا ما ليش في كلام الفلسفة ده، طول عمرنا والرجالة هي اللي بتفتح البيوت، والستات راضيين

وساكتين وطوع إحوازهم، إنما في زمانا الأخير ده، البنات
اغلغنت، وعينهم اتفتحت على كلام العلمانيين الكفرة بتاع
حقوق المرأة، لحد ما عنسوا، مش عايزين يعيشوا ويتستروا زي
زمان، كل واحدة دلوقتي عايزة تعمل في فيها زي الوليدة
الكر كوبة الحيزبون دي نوال السعداوي.

- طب وليه ما تقلش أن الشباب هما اللي استكفوا على
الأخر باللي بيشفوفه على النت والفضائيات؟

- ما هو برضه اللي ع النت و الفضائيات دول بنات، وهما
اللي عايزين كده، آدي آخرة المشي ورا العلمانيين.

- في نماذج لستات محترمة في الفضائيات، بيتكلموا في كل
حاجة حتى الحاجات الجنسية، ويوجهوا الناس بكسل أدب
واحترام، ياريت بس الناس تتعلم.

- دي ناس بتطلع تقول الكلام ده؛ عشان يقبضوا دولارات
ماما أمريكا، دول عايزين يشيلوا كلام ربنا من مناهج التعليم؛
لأن كلام ربنا في نظرهم بيشرح الإرهاب، ويخطوا بداله كلام
السكس وقلة الأدب، الحاجات دي مش بالتعليم دي بالفطرة،
فاهمة يعني إيه فطرة؟

- فاهمة طبعًا، بس الفطرة معناها إني أحس إني إنسان لسه
حقوق مش تابع لإنسان.

- ديتا هو الدين الوحيد اللي كرم المرأة، واداهها كل
الحقوق اللي ما كانتش تحلم بيها، بس الراجل راجل والست
ست، يعني زي ما ربنا يقول الرجال قوامون على النساء.
قوامون مش يعني أفضل.

- أهو ده بقى عيه، يا بنت الناس الطيبين، إوعي تسدي
ودنك للتليفزيون والمشايخ بتوع ماسبيرو، ده إعلام موجه
بيخدم مصالح الصهاينة والأمريكان، أقولك حاجة كمان قالها
لي واحد صاحي في المخابرات، إنني عارفة عشان يعينوا أي
مفتي، بيحيبوه ويعملوله حاجة كده زي كشف هيئة، يقعد
معاه واحد من مستشارين الرئيس، يسلم جتته بكام سؤال كده
مستوردين من أمريكا.

- إيه رأيك في التدخين؟

- طب إيه رأيك في عمليات ترقيع غشاء البكارة؟

- وبعد كده بقى يسألوه سؤال الامتياز، السؤال المعضل
اللودعي الشهير، إيه رأيك في موضوع ختان الإناث؟

- والله بقى عاش في الدور، وعمل فيها ابن حنبل، وجاوب باللي يعرفه ويرضى ضميره قدام ربنا، يبقى آخرته هيتعين إمام لزاوية ما حدش حتى يبصلي فيها، أما لو جاوب إجابة نموذجية ترضى عنها الجامعة الأمريكية، فهنيئاً مريئاً له كرسي الإفتاء.

- انت كل حاجة بتفسرها على هواك، الطب قال إن الختان ده فيه خطر على صحة الست الجسدية، والنفسية، والجنسية كمان، إيه بقى اللي دخل اليهود والأمريكان؟!!

عبيطة وجاهلة، ما اليهود والأمريكان هما اللي يقولوا الكلام بتاع الخطر والعوق ده، والبغغانات اللي عندنا بيرددوا وراهم أمين، ده موضوع كبير أوي أوي، وحملة على ديننا، وإيماننا، وعقيدتنا، وعاداتنا، وقيمنا، إيش فهمك انت، إذا كان وزير الثقافة بجلالة قدره ساب كل السبلاوي اللي عنده، والخرامية، والفاستين اللي تخبوا ملايين في وزارته، ورايح قال إيه بيهاجم الحجاب فرض ربنا، ما هو الإسلام دلوقتي مالموش دية، كل من هب و دب مش لاقى حاجة يعملها، يقوم رايح ساب الإسلام، والعرب، والمسلمين، مؤامرة أمريكية على الإسلام، لأ، و بيدعوا فضيلته كمان النساء للسفور، والتبرج، صدق ربنا "أفحكم الجاهلية ييغون؟" أهم دلوقتي عملوا وزارة بحالها، قال إيه وزارة الأسرة ومسكوها ست، يعني بانست

الحكاية كلها، بعد كده الرجال هيقوا الخمسة بشلن، مسش عارف فلان ضرب مراته هاتوه، علان علا صوته على مراته خزوقوه، مش بعيد تكون الخطوة الجاية وزارة سيادية لشؤون الختان، ويكون شعارها مشروط عليه علامة إكس، ويتم عمل حملات تفتيشية بالتعاون مع وزارة الداخلية للتفتيش على النساء في المنازل، والتأكد من عدم وجود أي امرأة أجريت لها عملية ختان، وإلا سيتم توقيع غرامة فورية عليها، و سحب قسيمة الجواز، ويجعله عامر.....

عوض

صار من مفردات الحياة لدرجة ادهشت عوض أو الشيخ عوض - كما يناديه الجميع و إن كان لا يحب هو أن ينادونه الشيخ عوض - لقد بات يشعر به في أجساد الموتى و هو يسلمهم إلى التراب و بعد الدفن أيضاً، اكتسب عوض خيرة لا تضاهى و لم تخبر عنها الكتب الدينية جميعاً في التعامل مع الموت، خيرة التعامل مع الأجساد العارية من الروح منحتة ما يشبه الرؤى و الكرامات، فضل عوض الحياة وسط مقابر الأموات على الحياة وسط مقابر الأحياء، كان يزعجه كثيراً إذا جاء أحدهم ليسأله عن قريب له مات و غسّله و دفنه عوض ، يأتي هذا القريب ليسأل عوض هل هذا الميت من أهل الجنة أم من أهل النار؟ يغضب عوض بشدة لهذا السؤال ، يكره بشدة أن يتعامل أحد معه على أنه صاحب كرامات أو أنه ولى من أولياء الله الصالحين، يرى أن الكرامة الحقيقية هي الكرامة التي تمنح بعد الموت، التي يمنحها الله لعباده الصالحين بعد أن يتركوا الحياة.

" النفس تمنى الكرامة و أعظم الكرامة لزوم الإستقامة"
كما قال ابن تيمية.

مازال هذا الأمر يقلقه ، كيف تمكن من كل هذه
الأجساد؟، لماذا في هذا العصر بالتحديد؟ ، صحيح أن فساد
الذمم قد استشرى بصورة كبيرة و أصبح الضم ذاته من
جنوده المخلصين لكن هذا ليس هو السبب الرئيس، هل
وجوده هذا له علاقة بإيقاع الحياة شديد السرعة؟ لكن
الأطفال أيضاً لم يسلموا من شره وامتلك أجسادهم الضئيلة ،

" أنا أرملة أعول أربعة أطفال في مراحل التعليم المختلفة
و عندي طفل مريض بسرطان العظام ساعدوني و لكم الأجر
و الثواب عند الله"

لماذا بات يستخدم حتى في الشحاذة؟ هل تستخدم سمعته
القاسية من أجل إستمالة القلوب لتضغط على الجيوب فتخرج
النقود كرشوة لإتقاء شره و فحشه؟ ولماذا يتحالف مع الفقير
أحياناً في صفقات دنيئة؟

عوض يحاول أن يستكشف الأمر، هل هو يأكل الجسد
لترقى الروح في مدارك بعيدة ؟ ولكن ألا توجد طريقة أخرى
ترقى بها الروح بعيداً عن سلطانه الغاشم؟

كان عوض بنظرة واحدة إلى الجسد المسحى أمامه يعرف
هل عانت الروح في خروجها من هذا الجسد أم لم تعان

و خرجت كمثّل طيف رائق، كان يعرف هل خرجت الروح
على أثر مرض أم حادثة أم خرجت أثناء النوم و لم تعد، كل
هذه الكرامات لم يحك عوض لأحد مطلقاً عنها، لأنه يرى أن
شكر الله عليها يكون بعدم البوح بها لأى أحد مهما كان وأن
تظل محفوظة كسرلاً يعلم به أحد مطلقاً، وإن لم يمنع هذا
الناس عن الاعتقاد فى كرامات عوض ، كانوا يأتون إليه
يزعجونه باستمرار بأسئلتهم الساذجة عن كيف يتحمل الحياة
دائماً وسط رائحة الموت مع أنهم هم فى قلب الحياة و يشعرون
بالسأم و الملل ؟

لم يكن عوض يعانى أياً من مشاكلهم فى حياته ، حياته بين
الأموات منحة خلوداً فى الزمن ، منحة إلتحاماً بعقارب ساعة
روحه فلا تمر أوقاته من حوله بل تنساب بين يديه إنسياباً يدفع
عنه أى يأس أو ملل يعانى منه الآخرون.

إيقاع الجسد إذا سبق إيقاع الروح وقع الجسد ضحية من
ضحاياه، بهذه المعادلة استطاع عوض كشف سر هذا اللعين.

الفهرست

٥	إهداء
٥	أسئلة أحمد
٩	البلد
١٥	الحاج
١٩	انتحار
٢٧	ناردين
٣١	كارت شحن
٣٥	فوتوشوب
٣٩	قال النبي
٤٣	حكاية الأسطى عشري

٥٣	كنيسة
٥٧	رابعة .. نادي السكة
٦١	ضرورة فنية
٦٥	طلاق
٦٩	عانس على ذمة السيد فلان
٧٣	عروبة
٧٧	مؤامرة
٨٥	عوض

